

Hibru

Anut Nanun san yaŋan tubun a

¹ Wagam na mok profet adi awad lo Anut id tubud baged ru irupidai se ya, saen wei mi agod dal sensen lo inŋ ago igane ya. ² Gug gamu nal wadan en lo man inŋsinan Nanun awan lo irupaiad a. Inŋsen lo mok Anut mel fidian igane ya, agod Anut sen inŋ murnap mel an fidian taman imado wo ipiliani a. ³ Inŋsen inŋ Anut san lilaman inŋ lo yen dan isapudadeg Anut san girager tubun an kuai te ikubiai tile ya. Inŋsan bunun an nek Anut sinan bunun mok igo ya. Agod inŋsinan ru dabai an nam mel fidian igane ilasag yen yau da. Inŋ tamolpein sad aupasek isuas yau san dal ikubuneg itout a, ago gug inŋ kumaen panu lo Anut lak na yak inŋanen banin won ak lo imasig imado ya.

Nanun san yaŋak eŋel sad yaŋak irinŋani a

⁴ Anut yaŋak Nanun ipani an uyanan mok a. Yaŋak an eŋel adi sad yaŋak dam irinŋani a. Nek ago mi Anut Nanun ipilianig dabai tubun eŋel sad dabai irinŋanai ak ipani a. ⁵ Anut eŋel ta irupeig ibol, “Onŋ naineŋ nanug, agod gamu nŋai onŋane tama.” Inŋ ta ago ibol na ya. Agod fon eŋel ta ninŋen ago ibol, “Nŋai inŋsan taman nŋumado dop inŋ nŋaisag nanuk imado wa.” An dam ta ibol na ya. ⁶ Gug saen Anut Nanun matu an iganeg tan na ipalu an ninŋen o ago ibol, “Anut san eŋel adi fidian inŋ ninŋen o ubou an dile wa.”

⁷ Aria, eñel adi sed niñedi wo man Anut ibol,
“Anut iñanen eñel adi man tim igo woñ a,
iñanen urat pinein adi man yai balen imasa dak igo
woñ a.”

⁸ Ak man Nanun niñen o ago ibol,
“O Anut, oñsa Kinj san kalik an pempem yen yau
san a.
Agod Kinj san makud bani lo wabi dan an kagin
itaot san makud igo woñ a.

⁹ Oñ kagin itaot ak niñen o mi umat da, agod kagin
saian ak umoi geig da.

Fun amaiak niñen o Anut, iñ oñane Anut, oñane
tura murou sad malan te iginio ya,
agod yousai san gurenj an oñ tini fo ikulmaek idu
ya.”

¹⁰ Anut Nanun irupeï dag ibol,
“O Tubun en, fun lo mok oñ tan en san kadañ guni
a,
mel fidian lak na yan dam oñse bani lo diri a.

¹¹ Mel an fidian dideg diau a, gug oñ man mado
wa,
iñ yamel wagam ak itout yau igo woñ a.

¹² Oñ nek ibol yamel dululumip diabi yau ak igo
woñ mel fidian lak na yan, tan en lo dam
ago gane wa.

Nek ibol yamel wagam ak dupasip foun ak digane
dak igo woñ, oñ mel fidian bilisap foun ak
dilasa wa.

Gug oñ man igo pempem mado wa,
oñsa anañar itout san tia ya.”

¹³ En dugo, Anut eñel ta irupeig ago ibol,
“Oñ ñaisag aben malan te yak ate mado dop
ñai oñane ager adi ñidiraip paen na dumado wa,”

Anut ru ta ago ibol man tia ya. ¹⁴ Enjel adi an enso mel ta i? Inj man ur, amaiak Anut idinaig tamolpein a patud ipasi san amaiak dibinawai o dudu ya.

2

Anut injiliad an mel tubun a

¹ Fun amaiak ninjen o id ru rumok a talonj an tabi sakar a, ago dop an lo na id tadeq tau san tia ya. ² Tubud baged adi wagam enjel awad lo kubiaenj san ru dijane ya. Ru dulonj an yen sakar da, fun an ninjen o talpein enti aupasek ta igane, tia, awa parsisalek ta igane tap, kulob an san naon atem itaot injane wa. ³ Fun amaiak ninjen o id patu pasek uyanan en patud tupani tap, en dugo wonj id aupasek naon an tabi-riñani waki? Tubun en injen malan malan mok patu pasek ninjen o ibol ilasa ya, agod a inj awan dulonj an id dukubiai tile yak ru an ru rumok a. ⁴ Saen nek an lo mi Anut tamolpein a mel malad nam dile amaiak inj sad ru an dabai ipani. Inj kulob girager agod urat dabai tutubun ak igane na ya, agod injen ilon ibol ak lo mi Awan Urgan san dabai lo inj urat digane san bar funfun iwae pidinai a.

Jesus sen imug injiliad a

⁵ Man dugo, Anut inj enjel adi tan foun murna ilasa wan kagin dupani wo ta ipilianai na ya. Tan amaiak ninjen o ñai ru ñabol da. ⁶ Gug Anut san girek ta lo ru en igo ibol,
 “Tamol man nek mel kawan ak igo ya, amaiak ninjen o, ata wo inj o ilo isou di?”

Tamol nanun man in mel tubun tia ya, an ninen o on ata wo in kagin pani uyan di?

⁷ On saen katukan mi in enel paed na gane ya, agog in girager yanak tubun ak da pani a,

⁸ agod mel fidian in taman imado wo tuon lo diri a.”

Aria, saen Anut tamol igane yan, in mel fidian sad taman imado wo ago ibol a, an lo in mel ta ibiseip tamol san kagin panek patun fo yen man tia ya. Ak man gamu saen en lo man tamolpein mel fidian kagin dupani dop id tile man tia ya. ⁹ Gug id Jesus mi tile da, in saen katukan mi Anut in enel paed na imado wo igane ya. Agod ilo munanek Anut ipanad dan ninen o in tamolpein fidian abed inaneg mater in ile ya. Mater in an lo na in madai ikubiani a, fun an ninen o gamu id tile yak in yanak tubun ak girager da inane ya.

¹⁰ Nek uyan ak Anut in mel fidian idirig ago dien diau dan, Jesus madai isini an lo in iganeg itaot mok ilasa ya. Nek an lo in nanuk wei mi inal ipalup in san girager an lo in da sisem dumado wa. Man ata wo? Jesus sen in patun pasek san fun.

¹¹ Ta a tamolpein gun dilasa wo igane dan, agod tamolpein a gun dilasa yan, in sisem fudi kisaek a. Fun amaiak ninen o Jesus in tein taon ibol san ninen o miai ta ifuni da. ¹² In Anut ninen o ago ibol da,

“Nai onsa yana an teig taog nurupidai dulon a, insad tumanek lo nai bar nabi dop on yana nabisa wa.”

¹³ In dam ago ibol,

“Nai Anut tinig nupanig numado da,” agod in fon ibol,

“Nai ebo Anut nanun muroun ipanag emaiak dida mumado da.”

¹⁴ Inſan nanun muroun en man inſ tan en san tamolpein mi, fun amaiak ninen o nek inſ dumado dan ago mi Jesus dam inſan tinin, tan en san tinik igo wonſ ilasa ya. Inſ ago igane yan lo inſan materſ lo Satan materſ san dabai aman da yan ka ipitiſini wa. ¹⁵ Dal emaiak lo inſ tamolpein inſaned materſ san rirek lo patud ipasig maror ipidinai a, inſ fon materſ san rirek inſaned madok lo kagin ipidinai yau san tia ya. ¹⁶ Id talonſ ak mel an man rumok a, man dugo, inſ enſel ta ibinawai na ya, tia, inſ Abraham san sawar ibinawai a. ¹⁷ Ago yak ninen inſanen kagin naok naok lo inſ tein taon dumado dak ago mok ilasa wa. Ago dop an lo na inſ inſaned pris malan te yak ilasap ago imado wa. Inſan urat awan lo Anut ibinawi dan igo ya, inſ awa yabek tamol agod ilo muſanek tamol an lo inſ tamolpein sad aupasek an ninen Anut ilon igane ibubarum a. ¹⁸ Inſen aupasek san ate suek lo itur go madai ikubiani a, fun amaiak ninen o inſ gamu tamolpein a aupasek san ate suek dile dan ka ibinawai uyan a.

3

Jesus san yanſak tubun an Moses yanſan iriſani a

¹ An ninen o anſ naineg teig taog gun ak, anſ man da Anut san wagiſn an lo itumanad go tumado dan, anſ Jesus ninen o mi ilom isou a. Inſ aposel agod inſ pris malan te yak an ninen o tabol ilasa da. ² Inſ Talpein a ipiliani an awan iri pani a, nek ibol Moses Anut awan kagin ipanig Anut san ab ilon lo urat igane igo ya. ³ Nek ibol tamol ab yabi an yanſan

tubun dugo ab mok sen man yañan tusan ak ago ya. ⁴ Rumok, ab fidian kisaek kisaek atem tamol diabi da, ak man Anut sen in mel fidian idirai an iriñanai a. ⁵ Moses in Anut anen ab san tamolpein fidian lulunad lo urat pinein igo Anut awan iri panig urat igane ya. Nek mel amaiak saen murnap ilasa dan te dop ru a in niñen dubol an Moses dam gubak mi niñen o ibol ilasa ya. ⁶ Ak man Kristus in Anut Nanun mok imado ya, an lo in Anut san ab lo tamolpein kagin ipidinai a. Id dabai amad da Anut anen ru tabol dan, id ilo uyan amad da mel a Anut ipanad ak niñen o ilod yen dan tabi sakar tap, id Anut san ab mok a.

⁷ Amaiak niñen o nek ibol Awan Urgun gubak mi ibol ago,

“Nek gamu en, an inñsan awan alon tap,

⁸ añanem bubem aganep sakar ilasa amoi.

Nek ibol wagam an tubum bagem bitinaek san saen lo tan kawan ak ate Anut patud dupani ago mi,

an kagin an ta agane na wa.

⁹ Saen an lo in nai tuog lo bitinaek an diganeg dukubianag se ya.

Anañar 40 naisag urat dabai fidian nigane an dile bo man nai patud dupanag se ya.

¹⁰ Fun amaiak niñen nai in niñedi wo tiñaeg saian go ago nabol,

‘Inñsad bubed lo in pempem dal senamo diau da, agod in naisag dal dugo won nau dan ta dulon na ya.’

¹¹ Naisag tiñaeg saiak lo geg sakar ak nigane yan, ago nabol,

‘Rumok lak na, in̄ n̄aisag yaes bilabal lo ta mok diladu na wa.’ ”

¹² An niñen n̄ai teig taog, kagin agane wa. Kabelan an̄ lulun̄am lo ta in̄ buben ilo sou saian aman dap, ilon lo rumok tiap, Anut kumaen pempem san an patun ipani banau. ¹³ Tia, nal fidian an̄ tan suek ru nug arupei, nal “gamu” dubol dan lo an̄ ago agane wa. Kabelan aupasek san kagin irawan̄ dop an̄ lulun̄am lo ta bubem afutani banau.

¹⁴ Ilo rumok malan malan an id fun tiganeg an tabi sakar pe yaup wadan na idu tap, an lo id Kristus da sisem tutumani wa. ¹⁵ Id talon̄ ak ru e Anut Dawid ipani yen yen geig da, an ago ibol,

“Nek gamu en, an̄ in̄san awan alon̄ tap,

an̄anem bubem aganep sakar ilasa amoi.

Nek ibol wagam an̄ tubum bagem bitinaek san saen lo tan kawan ak ate Anut patud dupani ago mi,

an̄ kagin an ta agane na wa.”

¹⁶ En sauta wagam Anut awan dulon̄ gug awa parsisalek digane i? An tamolpein wagam Moses in̄al go Igipta tan dibiseig diau ama ya. ¹⁷ En sauta anañar 40 in̄ Anut tin̄ae saiak dupani se i? An tamolpein a aupasek diganeg dumat go sad susanud tan kawan ak ate dudu ama ya. ¹⁸ Agod en sauta niñedi wo Anut rumok lak na yaes bilabal lo diladu san tia ago ibol irupidai i? An tamolpein a in̄ awan duparsisali ama ya. ¹⁹ An niñen o id tile talon̄ ak in̄ diladu san tia ya, man dugo, in̄ ilod lo ta rumok na ya.

4

Anut san tamolpein inſan yaes bilabal lo diladu wa

¹ Aria, id Anut san yaes bilabal lo tiladu san ru gubak mi yen la ya. Fun amaiak niſen o id man tarut dop tarer a. Kabelan Anut aſ aenta luluſam lo ta bitinaek lo idiraſ pe, aſ inſan yaes bilabal lo aladu san ariſani banau. ² Rumok, Anut ru id giraſed na ipalu yan, nek gubak mi inſ giraſed na ipalu yak igo mi a. Gug ru a duloſ an ta ibinawai na ya. Man dugo, rumok inſ ru an duloſ a, ago gug inſ ilod lo ta rumok na dan lo ru an nuſon ta ifu na ya. ³ Id ilod lo rumok an mi yaes bilabal amaiak lo tiladu wa. Nek ibol inſ ibol ak igo,

“Naisag tiſae saiak lo geg sakar ak niſane yan, ago niſabol,
‘Rumok lak na, inſ niſasag yaes bilabal lo ta mok diladu na wa.’”

Saen Anut tan en iſane yan lo inſan urat fidian iſane itout a. An niſen o id taloſ ak, Anut san yaes bilabal yen la ya. ⁴ Man dugo, girek ta lo inſ nal seven niſen o igo ibol,

“Anut nal seven lo inſanen urat an fidian niſedi wo yaes ibal a.”

⁵ Agod fon girek kiſaek en lo igo ibol, “inſ niſasag yaes bilabal lo ta mok diladu na wa.”

⁶ Amaiak niſen o id tile dak aenta diladu san dal ipaſig yen da, ak man aenta a gubak mi Anut ru diſane yan diladu san dal diriſani da, man dugo, inſ awa paſiſalek tinadi a. ⁷ Fun an niſen o inſ fon mi nal itaot ipiliani a, “gamu en”, ata wo, Anut tan iſaneg saen milaen mok gug Dawid awan lo igo ibol,

“Nek gamu en, an inſan awan alon tap, ananem bubem aganep sakar ilasa amoi.”

⁸ Rumok, Josua in yaes ka ipidinai tap, Anut mur-nap fon mi nal sen ak ninen o ibol san tia wa.

⁹ Fun amaiak ninen o yaes bilabal bageu san Anut anen tamolpein ninedi wo yen da, yaes bilabal an nal seven san igo ya. ¹⁰ Man dugo, ensauta Anut san yaes bilabal lo diladu dan inaned urat tan en lo digane yan dibisei da, nek ibol Anut inſen urat a igane dan ibisei ak igo mi a. ¹¹ An ninen o id yaes bilabal amaiak lo tiladu wo urat wagai tigane wa. Ago dop aenta luluſad lo awa parsisalek kagin naok an lo diau dudu banau.

¹² Anut san ru man kumaen a, agod dabai aman da ago yen da. Nek ibol bubarek kisaek malan uraru aman da yak igo won, an talpein tinin isuep iladu yau geig da, inſan nſutun ur da ibiatai da, tatu batek dam titinſaem igilep sensen dilasa wa. Agod bubed san kankan in ilo girek da ka ikubiani san ilon da. ¹³ Agod in malan lo talpein ta imianuk san tia ya. Tia, enti id ru naon tupani san in malan lo man, mel fidian walal te mi itufalak go dien da.

Jesus sen idsad pris malan te ya

¹⁴ Id pris malan te tutubun ak amad da ya, an ninen o in lak na yaug, id Anut san na tau san dal yabirubeg iladu ya, an man nek Jesus, Anut inanen Nanun. Amaiak ninen o id ilo rumok san ru tabol ilasa san tabip sakar a. ¹⁵ Dugo, idaned pris malan te tubun ak idsad muruan funfun ninen o ilo muſanek ipanad san ta idaisuda na yak i? Tia, in tamol naok ago tia ya. Man dugo, bitinaek naon funfun id lo ipalu dan ago mi in lo dam yau da, ago

gug inj aupasek ta igane man tia ya. ¹⁶ An ninjen o id pempem Anut san kalik giranjen na tau a, ante man Anut ilo panek iwae san aben mi a. Aben an lo saen muruan sumeik ipanad dan, ilo munjanek ka tinjane wa, agod injsan ilo panek id ibinawad san tile wa.

5

¹ Pris malan te yan kisaek kisaek tamol lulunjad lo Anut ipiliani a. Agod injsan urat man, tamolpein waged lo lou kawan ak inj mel mudan a yai lo dumari san da, injsad aupasek ipasi yau wo Anut ipani da. ² Inj tamolpein a ilod tia yan, agod a dal diapitilip sen diau dan dam mos nam kagin ka ipidinai a, man dugo, inj dam dabai aman tia yan lo yau idu da. ³ Fun amaiak ninjen o, inj malan malan man injsinan aupasek isuas san ninjen o yai igane wa. Agop murna man tamolpein sad aupasek ninjen o dam yai ka igane wa.

⁴ Pris malan te yak inj yanjan anda ya, ago gug talpein ta sen ilon nam urat an injane san tia ya. Tia, Anut talpein an imug iwagin a, nek ibol wagem Moses tein Aron iwagig pris malan te ilasa yak igo mi a. ⁵ Nek ago mi Kristus dam inj sen tinin nam pris malan te yak imado wo ta igane na ya. Tia, enti a inj irupeig igo ibol,
 “Onj njaineg Nanuk,
 agod gamu en njai onjane Tama njumado da,”
 amaiak Kristus ipiliani a. ⁶ Agod girek ta lo fon igo ibol,
 “Onj pris pempem san,
 onj pris naok Melkisedek imado yak igo, onj dam mado wa.”

⁷ Saen Jesus tan na imado se yan, inanen gudanek lo pempem imosiai dugo, awan tubun mi tinaŋ iganeg Anut o maten san dabai lo ka patun ipasi wo igudani a. Agod in Anut awan kagin ipani uyan go sen yabi idu ya, an lo Anut in san gudanek ilon a. ⁸ In man gidad Anut Nanun bo man, madai isini se yan lo awa yabek kagin ilon uyan a. ⁹ Agod saen in awa yabek kagin a lo itaot mok ilasa yan, in tamolpein ensauta awan kagin dupani dan ninedi wo patun pasek pempem san fun mok ilasa ya. ¹⁰ Agod Anut in pris malan te imado wo kob ipani a, nek ibol Melkisedek igo mi a.

Dutur sakar san ru kagin

¹¹ Mel en ninen o man ru mubate wo iloma yen da, ak man man fun mabol ilasa wo kitek muruan a. Man dugo, an alon pe anane kisaek san tia ya. ¹² An girek manau alasa san saen idaisuda ya. Ak man talpein ta fon pitenanek pasauman ak lo Anut ru ilon lo yen dan ikubiai panaŋ san ninen o an katuk amami da. An anan sakar ak ani san ta idaisuda ya, ago gug an su mi aluk san ninen o katuk amami da. ¹³ Alon uyan, enti in su mi iluk o igane dan, in kagin itaot san ru ninen o in aon da, man dugo, in nanuk mi a. ¹⁴ Ak man anan sakar man tamol tutubui ak sadi a, en sauta a Anut ru pempem dusuti dan lo, mel uyan ak saian ak da ninen o ilod igire dugo dupiliani uyan san dulon da.

6

¹ Ago yak ninen o id tamug tilasap, pitenanek pasauman Kristus ninen o yan tibiseip yen dop, tusokalik pe tamol tutubu yak sad pitenanek lo tiladu

wa. Id gamu pitejanek pasauman ak tibiseip bag foun ak tugunai wa, kabelan id bag wagam an fon mi tugunai o tigane banau. Ru en igo ya, matej san urat fidian lo id ilod ibileksap tadanja san pitejanek, id Anut ilod lo rumok ak san pitejanek da, ² agod fulanek funfun san, tinid fo banim agane san, dumat pe fon dumasa wak, agod Anut id bitinaek lo idirad pe pempem san pani naon ipanad san, an fidian niñedi wo ta tabol na wa. ³ Aria, id gamu en tamug tau a, agod Anut awok ibol tap man, id ka ago tigane wa.

⁴ Ak dugo, tamolpein a in gubak mi Anut san lil-aman injad turenj lo isapudade yan, agod kumaen panu san binawek kawan a igane ipalug dukubiani dile yan, agod nug dupinig Awan Urgun da dutor dan, ⁵ agod in Anut san ru a dukubianig dile yan uyanan, agod in madok a sumeik ipanad dan san dabai sensen dile dulonj la bo man, ⁶ murnap Anut patud dupani tap, an dugo ilod isou wak i? Id talpein an ka tanjal tamul pe ilod fon ibileksa san dal dile wak i? Man tia geig a! Man dugo, kulob en igo digane tap, an man in fon Jesus aigim fo dubali da wa, agod in tinin diabisa dop malak malak lo miai dupani wa.

⁷ Tan en lo saen wei mi ui idu den san you iluk da, agod ananj uyanan ak tamolpein a ananj dupae dan niñedi wo igane ilasa tap, Anut san bar uyanan inane wa. ⁸ Gug tan en in ai dudurun anda yak mi, kurkur saiak saiak mi disa tap man, tan an saian a, agod lou aman tia ya. Saen milaen tiap tan muroun bar saiak ipani dop ipitiñini wa. Tan en itout san man dumari wa.

⁹ O maŋsama adi, maŋ ru an mabol bo man, maŋ an niŋem o igo iloma lo rumok. Melmel patun pasek san uyanan ak mi an, an o ilasa wa. ¹⁰ Man dugo, Anut in kagin itaot tia lo, ananem urat agod ananem ilo panek, saen in yaŋan lo an gun adi kagin apidinai se yan, an akubiai apidinai dan ile pilti san tia wa. Kagin uyanan an an gamu nek ago mi agane da. ¹¹ Maŋsama iloma igo woŋ a. Nek ibol kagin a an lo atur sakar dan, nek ago mi an ananem ilo rumok mel a niŋen an tinim agane dan abi awan isap, an lo dam atur sakar a. An anek anek atem urat wagai agane dop amado yaup ananem saen wadan ilasa wa. ¹² Dal amaiak lo an ta ayalis na wa. Tia, an dam tamolpein a Anut ilod lo rumok go, muruan lo dutur sakar dan lo, Anut san promis diŋane dan, inŋad kulob an an agam anane wa.

Anut san promis san nuŋon ilasa wa

¹³ Saen Anut Abraham promis ipani wo ilon yen, talpein ta inŋan yaŋan an, Anut yaŋan iriŋani dan imado man tia yan niŋen o, Anut sen yaŋan lo rumok lak na ibol go ¹⁴ ago ibol, “Rumok geig, ŋai on bar uyanan ŋupano wa, onane mala kubalan wei mi ŋiganep ilasa wa.” ¹⁵ Abraham ru an ilon go sen dabai ipanig, mala nouk imado yaug saen milaen gug promis an san nuŋon inane ya.

¹⁶ Rumok, tamol adi in talpein sen ak iriŋanai dan yaŋan lo inaned ru dabai dupani wa. Agod saen in ru lo nug dufuni dan, kulob an lo ru digane itout a. ¹⁷ Ago yak niŋen o tamolpein a Anut inŋan promis san nuŋon diŋane wan, inŋan ilobol ibileksa san tia yan, an kuai te ikubiai dile wo ilon yen da. Amaiak niŋen o in ru rumok lak na ibol an lo inŋan

promis ru dabai ipani a. ¹⁸ An lo na mel uraru a tibilsa san tia yan, agod an niñen o Anut sewak ipanad san ta isuda na yan, lo id tan suek tubun ak ipanad a, an lo id a aupasek niñen o tasol man, melmel a naod na iganeg niñedi wo mala naok tumado dan, tiñanep tabi sakar on a. ¹⁹ Id Anut tinid tigane tupanid amaiak anga igo won njud yabituani da. Tini ganek amaiak dabai aman da ya, an lo iganeg id dalawan san yamel an patun fo taug galun Gun Di, Gun Mok an ilon lo tiladu ya. ²⁰ An lo Jesus id niñed o imug mi iladu ya. In man pris gurman pempem san, naok Melkisedek igo won ilasa ya.

7

Melkisedek yan an tubun a

¹ Melkisedek in taun Salem dubol dan san kin, agod in Anut Naon Tubun Lak Na yan san pris imado ya. Saen Abraham yu iganeg kin aenta ifu itout go imul an, Melkisedek Abraham ile wo yang dal na nug dileg bar ipani a. ² Agog Abraham mel fidian isini an itarpaleg malan 10 itumani, ago gug malan kisaek in aneg Melkisedek ipani. Aria, yanjak Melkisedek man fun igo ya, “kagin itaot ak san kin,” agod in mi Salem san kin, an san fun man “maror san kin.” ³ In tinaran taman tia, tubun bagen dam tia ya. Tinaran igansi ak san nal, imat ak san nal dam ta talon a. Nek ibol Anut Nanun on imado ya, in pris pempem san imado da.

⁴ An Melkisedek yan an tubun an ale. Abraham idsad tubud baged malan inug ak, yu san bioun isini an itarpaleg malan 10 gug malan kisaek

inane Melkisedek ipani a. ⁵ Ru ta Moses san kubiaen lon lo yen dan ago ibol, Livai san malan kubulan a pris urat diñane yan tamolpein sad melmel aenta diñane wa. Tamolpein an inñad biouñ ditarpalep malan 10 gug malan kisaek dipidinai a. Ago dugo gidad teid muroudi agod Abraham tubun muroun bo man dam mi a. ⁶ Ak man tamol Melkisedek an Livai san gugoi lo kisaek tia ya, ago yak bo man Abraham biouñ itumanig malan 10 gug itarpaleg malan kisaek Melkisedek ipani a. Melkisedek biouñ an inane tamol a Anut san promis yabi dan bar ipani a. ⁷ Id talon uyan ak tamol lak na yan bar tamol paen na yan ipani wa. ⁸ Amaiak ninjen o dal ta igo ya, tamol e Livai san gugoi lo dilasa yan binawek diñane bo man in dumat da. Ak man dal turan lo, tamol Melkisedek in dam binawek inane ya, gug girek en lo ibol in pempem imado yau on da. ⁹ Ru ta dam nap talpein ka igo ibol a, Livai inñen, tamolpein sad binawek inane dan, gidad in gamugo ilasa bo man binawek Abraham banin lo Melkisedek ipani a. ¹⁰ Man dugo, saen Abraham Melkisedek itumani ante man, Livai in bagen Abraham tinin lo imado se ya.

Jesus ibol Melkisedek on a

¹¹ Aria, pris adi a Livai san gugoi lo dilasa yan sad urat man kubiaen a Anut tamolpein ipidinai an san fun. Tamolpein pris an sad urat an lo in itaot mok ak dilasa tap, anta wo pris foun ak ta ilasa wo Anut imat di? Pris naok Aron san ago tia ya, tia, Melkisedek san ago mi a. ¹² Aria, pris san urat awan lo bileksak yen tap man kubiaen dam

lo bileksak yen a. ¹³ Tamol a manj ninjen o minjinen den man inj gugoi senamo ak san a. Ak man talpein ta gugoi an san, pris sad urat alta fufo igane man tia ya. ¹⁴ Id kuai tem talonj uyanan ak idsad Tubun en man inj Juda san gugoi lo ilasa ya. Agod gugoi amaiak mi ninjen o Moses pris ninjedi wo ru ta ibol man tia ya.

¹⁵ Mel manj ninjen o minjinen den ru binawek lo kuai isi geig a. Alonj uyan a. Gamu pris naok sen ak Melkisedek onj ak ilasa ya. ¹⁶ Inj pris san kob injane ya, kubiaenj ta gugoi dugon lo inj ilasa yan lo kob ta injane na ya, tia, kumaen dipitinjini san tia yan san dabai lo mi a. ¹⁷ Man dugo, ru en girek lo inj ninjen o ago ibol,

“Onj pris pempem mado geig a,
nek pris naok Melkisedek ago mi onj dam ago wa.”

¹⁸ Dal ta lo, kubiaenj malan malan mi an Anut patun fo igane ya, man dugo, kubiaenj an dabai an tia yak, agod nunjon an dam tia ya. ¹⁹ (Man dugo, kubiaenj an mel ta itaot mok ak igane ilasa san tia ya.) Dal turan lo, ilo rumok uyanan nunjon anda yak ikubiai panad a, an lo Anut sinjiren na tau a.

²⁰ Saen Anut ago igane yan lo insinanen ru dabai ipani a. Pris an Livai san gugoi lo dilasa yan, talpein ta ru dabai ipani man tia yan lo gidad pris dilasa ya. ²¹ Ak man tamol a ninjen o mabol la yan Anut insinanen ru dabai ipani an lo pris ilasa ya. Man dugo, Anut irupeig igo ibol,

“Tubud injanen ru dabai ipani la ya,
agod inj ilon ta ibilisa na wa.

Onj pris pempem mado geig a.”

²² Fun an niñen o Jesus man kontrak foun an san balsinane, agod kontrak an kontrak wagam an irinani a.

²³ Pris wagam san an wei mi a, man dugo, mater yabitanai, an lo urat digane yau san tia ya. Fun an niñen o pris foun ak pris dumat ak sad abed dinane se ya. ²⁴ Ak gug Jesus man pempem imado yau da. An niñen o pris san urat man nek ago mi igane yau on a. ²⁵ Ago yak niñen o tamolpein a in lo Anut sumeik dupani dan patud ipasi pasik anen idaisuda ya. Man dugo, in pempem imado dan niñen in waged lo Anut igudani da.

²⁶ Pris gurman naok ago yak id lo uyan a. In saian aman tia ya, in gun, ikok, in tamolpein aupasek adi an sinired na dam tia ya, agod Anut yabisag kumaen panu lo lak na isuda geig a. ²⁷ Nal wei mi pris aenkadi Anut yai digane pani da, malan malan in sinad aupasek dusuas san yai digane gup tinin te man tamolpein sad yai digane da. Ak man Jesus man in ago tia ya, in in sen tinin amaiak ibiseig nal kisaek tamolpein fidian niñedi wo aigim fo imat a. ²⁸ Rumok, kubiaen in tamol dabai amad tia yak ipilianaip pris gurman dilasa wa. Ak man saen Anut in ru rumok lak na ibol an kubiaen an patun fo igane ya. An lo Anut ru rumok a ibol an lo, in anen Nanun ipilianig pris gurman ilasa ya. Agod Anut in anen Nanun iganeg itaot geig ilasa ya, nek ago mi pempem imado wa.

8

Jesus idsad pris malan te ya

¹ Man ru mabol dan man mel malan te igo ya: rumok, id pris gurman uyanan ago yak amad da ya. Inj kumaen panu lo Tubun Geig ak san badim sinjiren na banin won ak lo imasig imado da. ² Agod inj Anut san ubou ab rumok ak lo pris san urat igane da. Ubou ab an man tamol ta dususe na ya, tia, Anut sen mi isuse ya.

³ Pris gurman fidian dipilianai dan inj tamolpein aned ilo uyan anan Anut yan an lo mel an dupani da. Agod inaned aupasek dusuas yau san mel mudan man Anut yai digane pani da. Fun amaiak ninen o gamu pris foun ak dam mel ta naon ago mi Anut ipani wa. ⁴ Aria, inj tan en san tamol tap man inj ta pris ilasa na wa. Man dugo, pris wei mi tan en lo dumado la yan, Anut san kubiaen kagin dupani dop yai digane pani se ya. ⁵ Ubou ab a tamol, lo Anut urat digane dupani dan man kumaen panu anen ubou ab san mitilaen igo ya. Fun amaiak ninen Moses Anut san ubou ab isuse wo igane dugo, Anut irupeig igo ibol, “Onj nai did fo na ru kagin njurupaio dugo ilo sou njukubiai pano yan lo, mel fidian gane ilasap itaot a.” ⁶ Gug gamu pris san urat Anut Kristus banin lo igane yan man uyanan geig a. Man dugo, inj kontrak uyanan ak san titinae tamol igo ya, agod kontrak an kontrak wagam ak irinjani a. Ata wo, kontrak foun an san bag man Anut anen promis uyanan, an lo wagam an dam san nunon irinjani a.

⁷ Kontrak wagam an lo muruan tia yak man kontrak foun ak ta ilasa san tia wa. ⁸ Man dugo, Anut tamolpein ilod lo saian ile ya, amaiak ninen o,
 “Tubun en ibol, alon ak, saen ipalu dan te dop

ñai Isrel tamolpein inñ Juda tamolpein dadi kontrak
foun ak mususe wa.

⁹ Agod kontrak en man ñai Isrel tubud baged dadi
mususe ago tia ya.

Saen an lo man ñai banid te ñibiaig ñañal go Igipta
tan mubiseig mupalu ya.

Man dugo, inñ ñaisag kontrak an mi kagin dupanip
ta diabi se na ya.

An niñen o ñai patug ñipidinai a.

Ñai Tubun en ago ñabol a.

¹⁰ Saen an ilasa dop, kontrak en ñai Isrel tamolpein
lo ñigane wa.

Ñaisag kubiaenñ an kabunñad lo ñidiri wak,
agod bubedi lo dam ñigire wa.

Ñai man inñaned Anut, agod inñ ñaineg tamolpein a.

¹¹ Nal en lo ta luluñad lo turan boi, tia, tein boi,
ipitenñanip ibol,

‘Tubun en ulonñ,’ an ago ta ibol na wa.

Man dugo, inñ fidian ñai dulonñ uyanan a.

Tamol yanñad tia yan, agod tamol yanñad anda yan,
dam fidian ñai dulonñ a.

¹² Man dugo, ñai inñaned aupasek an ñupasi yau a,
agod ñai inñsad muruan an ilog isou san tia ya.”

¹³ Aria, Anut kontrak foun ta niñen o inñinñ dan
fun man inñsan ilo sou lo kontrak malan malan an
man wagam san a. Agod mel ta wagam an la yak,
an saen katukan mi yen pe itout yau a.

9

Tan en san ubou ab lo ubou leil san kagin

¹ Aria, kontrak malan malan an lo ubou leil san
kubiaenñ yen a, ago dugo tan en san ubou ab ta dam
yen a. ² Ubou ab ta dususe ya. Galunñ malmalan an

lo lam ta, badim da, agod badim an fo bret Anut naon na didirig dien dan mi ante dien da. Galuñ an Aben Gun ak ago dubol da. ³ Aria, galuñ an patun fo man yamel dalawan te dususe ya. Yamel amaiak patun fo man galuñ taida yen da, galuñ an Gun Di, Gun Mok ago dubol da. ⁴ Galuñ en ilon lo alta ta gol nam diganeg yen da. Alta an fo man pawra mumalun bulbal ak sen nam yai digane da. Agod kunup kontrak an dam gol nam dubuluwig yen da. Kunup kontrak an ilon lo, bod gol a mana aman da yan, Aron san makud a balun foun ak idiri an dam, agod Anut san kubiaen pat aten uyan ak uraru fo na igire an dam, kunup an ilon lo dien da. ⁵ Kunup an fufo na Anut san ilo muñanek aben yen da, agod an gigin ananaem mi Girager san ejel uraru mi mitilaed dututuñanai an subarid duwate yang Anut tamolpein inaned aupasek ipasi yau ak san aben amaiak dutuanig dutur da. Ak man gamu mel an mañ fun fidian mabol dop alon san tia ya.

⁶ Mel an fidian ago digane itout a, ago gup murna pris adi galuñ malan te yan lo diladup inaned urat awan an digane yau oñ a. ⁷ Ak man pris gurman mi in galuñ tinin te an ilon lo iladu wa. In anañar kisaek ilon lo nal kisaek atem galuñ an ilon lo iladu da. In pempem dar inane iladup in sinan aupasek agod tamolpein nñeo lo kagin sisaiak digane na yan, dam fidian ipasi yau wo Anut ipani da. ⁸⁻⁹ Kulob en fidian lo ru fañan yen da. Mel an lo Awan Urgun kuai tem ikubiai tile ya, saen galuñ malan te urat anda ago itur se man, galuñ Gun di, Gun Mok san dalawan an itaug yen se ya. Man dugo, dalawan san yamel amaiak dal ifutani

a. Galuŋ malan te man kontrak wagam san saen, an naon inĵane ya. Ubou leil ab an ilon lo Anut ilo uyan mel dupani dop yai digane pani se ya, ak man mel an talpein ŋutun ibinawip ikok ilasa san tia ya. ¹⁰ Melmel an man sen kubiaenĵ ibol ago anaŋ nuaenĵ, you lukluk agod fulanek funfun digane dop lo ikok dilasa san mi a. Kulob en man tinik fufo yak san mi a, ago digane yaup melmel foun ak dilasa wan san saen ilasa wa.

Kristus san dar

¹¹ Ak man saen Kristus ilasa yan, inĵ melmel uyan uyan a dilasa la yan, sad pris gurman oŋ ago imado ya. Saen an lo inĵ galuŋ Gun Di, Gun Mok a uyanan geig agod itaot mok a tamol banid nam ta dususe na yan, ilon lo iladu ya. Galuŋ an tan en san tia ya. ¹² Inĵ nal kisaek o lian mi galuŋ Gun Di, Gun Mok an ilon lo iladu ya, agod dar a inĵaneg ida iladu yan man bilelek boi, tia makau nanun ta boi san dar tia ya, tia, an inĵsinanen dar mok a. An niŋen o id inĵiliad tamul pe inĵsan na pempem tumado yau san dal ipasi a. ¹³ Dugo, pris adi bilelek sad dar, makau nanun tamol sad dar, agod makau nanun pein ak san tatu, an diŋane go tamolpein a, Anut malan lo ilod ta ikok na yan, sad tinidi fufo dufurfi go gun dilasa ya, an lo tinidi ikok ilasa tap, ¹⁴ Kristus san dar sapta taida mip dabai ak i? Ur pempem san dabai lo, Kristus inĵsen inĵanen tinin a muruan aman tia yan dufuni imat pe mel mudan yai lo digane yak igo woŋ Anut ipani a. Kulob an lo inĵsen mi idsad ŋutud ibinawig ikok tilasa ya, an lo idsad ŋutud lo kagin a sad nuŋon a lo materĵ tile dan ipasi yau a, an lo id Anut kumaen imado dak mi ubou an tile wa.

¹⁵ Fun amaiak niŋen o Kristus in kontrak foun en san tamol titiŋae ak igo imado da. An lo talpein en-sauta a Anut ipilianai ak mi, in kumaen pempem san melmel diŋane san ipilianaig yen dan diŋane wa. Man dugo, mateŋ a ilasa amaiak lo, tamolpein kontrak a wagam paen na dumado dugo aupasek digane na yan patud ipasi a.

¹⁶ Aria, mateŋ kontrak san girek (pepa) ta yen tap, an man urat aman tia ya. Man dugo, tamolpein in girek muroun imat an dile dulon gup, girek an urat ka dupani wa. ¹⁷ Kontrak girek an mateŋ san saen lo mi dabai anda. Man dugo, saen girek muroun malan kumaen lo imado se yan, girek an kawan igo ya. ¹⁸ Fun an lo na wagam mel mudan dufu na yan sad mateŋ san dar amaiak kontrak wagam an dabai ipani na ya. ¹⁹ Saen Moses tamolpein naod na kubiaen an fidian ifulale idug itout an, in makau nanun bilelek da sad dar iŋaneg you da ibileksa ya. Ago gug yaug ai hisop raen ta kam daran ak bilelek fufulun sen nam dufou yan iŋaneg dar lo isamuni, ago gug iŋaneg ifurfi buk fo na isida gug fon tamolpein fidian sad na ifurfi yau a. ²⁰ In ago irupidai, “Dar en kontrak dabai ipani san, nek emaiak niŋen o Anut ru kagin ipanaŋ a.” ²¹ Kulob nek a igane ago mi dar an ifurfi ubou ab an fo isudag, ubou leil san mel an dam fidian fo ifurfi isuda ya. ²² Rumok, kubiaen paen na, mel wei mi dar nam ikok digane ilasa ya. Agod dar ta ikulmaek yau na yak man aupasek dam ta isuas yau na wa.

²³ An uyan ak kumaen panu san melmel anen mitilaedi an naok naok ago lo ikok dilasa da. Ak

man kumaen panu san melmel injsedi, naok naok a aenta irinjanai dan nam ikok dilasa da. ²⁴ Man dugo, Kristus inj tamol banid nam galun gun mok dususe yak lo ta iladu na ya. An man galun mok ak san tutunanek mi a. Tia, kumaen panu mok lo iladu ya. Gamu ante id niyed o Anut naon na imado da. ²⁵ Taida mi, inj saen wei mi injsen tinin ipani wo igane man tia ya, nek ibol pris gurman galun Gun Di, Gun Mok ak lo anañar kisaek kisaek lo dar a injsan tia yan da isinip iladu dan ago ta igane na ya. ²⁶ Ago tap, saen Anut tan en igane ilasag ipalu an lo Kristus nal wei mi madai ile wa. Inj ago ta igane na ya, tia, nal kisaek o lian saen wadan lo ilasa ya. Injsinanen tinin ipidinai an lo aupasek ipasi yau san igane ya. ²⁷ Anut ibol, tamolpein nal kisaek mi dumat a, ago gup Anut naon na bitinaek lo dutur a. ²⁸ Nek ago mi, Kristus dam nal kisaek dufuni imat a, an lo tamolpein wei mi sad aupasek isini a. Inj ago igane dugup afon imul ipalu da wa. Aupasek isuas yau san ta imul ipalu da, tia, tamolpein a inj o mala nouk dumado dan patud ipasi ipidinai o imul ipalu da wa.

10

Yai niganag wagam man aupasek ipasi san tia ya

¹ Kubiaen man mel uyan uyan murna dilasap dupalu wa, amaiak sad mitilaedi mi a. An man mel nunon tia ya. An lo tamolpein Anut anañar fidian yai naon kisaek anam digane pani dugo sinjiren na diau dan, kubiaen ikubuniaip itaot mok dilasa san tia ya. ² Dugo, kubiaen tamolpein itaot

mok idirai dilasa la tap, Anut yai digane pani se yan afon digane da wak i? Man tia geig a. Fun an ninen o, ubou leil san tamolpein saen kisaek atem ikok mok dilasa pasik tap, ilod lo aupasek ta afon dukubiani san tia ya. ³ Ak man tia, inşad yai niganag en man anaŋar fidian ago digane dop lo inşaned aupasek an ilod isou da. ⁴ Man dugo, makau tamol ak inş bilelek da sad dar man aupasek ipasi yau san tia ya.

⁵ Fun an ninen saen Kristus tan na ipalu yan Taman irupeig ago ibol,
 “Inş onş yai digane dupano wo, agod lou kawan ak dupano wo do umoi a.

Ak man tinik ta onş gubak mi kubuneg ŋai panag a.

⁶ Onş tamolpein nao na dilasa san yai niganag, agod aupasek isuas san mudan dam ninedi wo bube ta uyan na ya.

⁷ Agog ŋai ŋabol, ‘O Anut mala ipalu, ŋai ebo ya, nek ibol Anut san ru girek buk lo ninşeg o ibol ago mi a,

ŋai man onşane ilobol ŋigane wo ŋupalu ya.’ ”

⁸ Aria, malan malan inş ago ibol, “Tamolpein inş onş ninş wo yai niganag, lou kawan an, mudan tinid fidian dimari dan, agod aupasek san yai niganag digane dan ninşedi wo fidian umoi da.” (Gug kubiaenş ibol kagin naok an tamolpein ago digane wa.) ⁹ Inş ru awan ibate dag ibol, “Ŋai ebo ya, ŋai man onşane ilobol ŋigane wo ŋupalu ya.” An lo na inş dal wagam an ipasi yau dugo dal foun ak aben lo igane ya. ¹⁰ Agod ilobol an lo, Jesus Kristus saen kisaek o lian inşen tininş dufuni imat san o Anut ipani a, an lo id gun tilasag tumado da.

¹¹ Nal kisaek kisaek atem pris dumasa dutur pe yai ganek aben na inşinad urat awan saen wei mi digane da. Inj mel mudan naon kisaek an mi nal pempem Anut yai digane pani da. Ak man yai ganek naok an tamolpein sad aupasek ipasi yau san tia ya. ¹² Ak man Kristus nal kisaek mi lo sen tinin Anut ipani a. Kulob an nunjon pempem yen da. Saen kulob an igane itout man yaug Anut banin won ak lo imasig imado da. Man dugo, inşan urat itout a. ¹³ Gamu inj mala naok imado yaup saen Anut inşan ager adi dabai amad tia yan injal pe nien paen na idiraip dumado wa. ¹⁴ Man dugo, inj saen kisaek mi sen tinin Anut ipani an lo, tamolpein a gun idirai dilasa dan ikubuniaig itaot mok pempem san dilasa ya.

¹⁵ Awan Urgun dam mel an ninen o ikubiai ipanad go ago ibol,

¹⁶ “Saen an ilasa dop, kontrak en nai Isrel tamolpein lo njigane wa.

Naisag kubiaen an bubedi lo njidiri wak, agod kabunad lo dam njigire wa.”

¹⁷ Agog inj ru awan ibateg ibol,

“Nai inşad aupasek agod inşad kagin saiak saiak dam ilog isou san tia ya.”

¹⁸ Amaiak ninen o, saen kulob an Anut isuas yau tap, aben ante aupasek san yai niganag taida yen man tia wa.

Tatur dabai san ru kagin

¹⁹ Fun an lo na, teig taog, id Jesus san dar lo Anut san galun Gun Di, Gun Mok an ilon lo tiladu wo tarer san tia ya. ²⁰ Dal a tiladu san an foun, agod kumaen yen yau san a. Yamel an id tiladu san dal

ifutani a, ak man Jesus lo yamel an isireig dalawan id ipasi panad a. Yamel an inſen tinin amaiak naon inſane ya. ²¹ Agod id pris tubun malan te yak amad da ya, in Anut anen tamolpein an fidian kagin ipidinai da. ²² Fun uraru an niſen o id Anut ſinjiren na ilod ſiſaokan mi tau a. Agod idsad ilo rumok idaisuda amaiak niſen o injiliad san o tinid tigane wa. Idsad ilo sou saian saian an tiſanep inſan na tau, ago gup Kristus san dar ifurfip idsad ilo sou saian saian an isuas yau pasik a. Agod idsad tinid an you uyan ak lo ifulanip ikok ilasa wa. ²³ Id Anut injiliad pe kumaen panu lo, in da tumado wak san ilo rumok an niſen tamolpein turupidai dulon dan ta tabip ila iso na wa, tia, tabi sakar pe itaot yen a. Man dugo, Enti a ru ibol panad an, inſanen promis ru nuſon igane ilasa wa. ²⁴ An niſen id nug ilo sou tupanip nug tiſuſuſani dop nug niſen tamat dop urat uyan uyan ak tigane ilasa wa. ²⁵ Aenta ubou leil san kagin ſisem dutumani san o dumoi da, ago gug id kagin an ta tagam tiſane na wa. Tia, an tan suek ru nug apani wa, Tubun en imul ipalu san Nal ſumeik ipanaſ o ale dugo, kagin naok ago yan an luluſam lo agane ilasap tubun a.

²⁶ Id Kristus san ru rumok talon la gug id aupasek tigane ilasa won dan, id o mel uyan ak taida yen pe lo idaned aupasek ipasi yau san tia ya. ²⁷ Tia, tarut tarer dop, lo malad tigane dop tumado wa, man dugo, Anut san bitinaek agod yai wananan a inſan ager imiriaſ inanai yau san idsad na dam ago ilasa wa. ²⁸ Talpein enti Moses san kubiaen patun ipani dugo tamol uraru boi, tia utol boi, inſan kagin an malad nam dile tap, ta-

molpein fidian dufuni imat a, agod in ilo muṛaneḱ ta dupani na wa. ²⁹ Amaiak ninen o dugo, talpein Anut Nanun yaṅan ipare idu dop, kontrak san dar a iganeg gun ilasa yan mel kawan ago ile dop, ilo panek san Ur an awan nam saian ipani a, ago tap, muruan tubun geig ak sapta taida Anut ipani wak i? ³⁰ Man dugo, id talonḱ uyan ak talpein a igo ibol, “Naon panek man ḱaineg a, ḱai gubun an ḱukubune wa.” Agod afon, “Tubun en inanen tamolpein bitinaek lo idirai a.” ³¹ Rumok, Anut kumaen pempem san banin lo tau tadu tap, an tarut tarer san mok a.

³² Anḱ saen gubak mi lilaman aṅaneg, an lo atur sakar dugo muruan funfun tinim fo ipalu dugo asini na yan, an ilom isou uyanan a. ³³ Saen aenta lo an malak malak dugunanḱ pe naom dufuteg dumisilanḱ dop muruan dupananḱ se ya. Agod saen aenta man an aenkadi in luad te dida atumanig, muruan nek ago mi saian geig ak dupidinai se yan, an dida asini na ya. ³⁴ Anḱ tamolpein a subanek ab lo dumado dan sad na au dop ael se ya. Agod saen aṅsam filiam dusu diau dop an ilo uyan lo mi aelafu onḱ se ya. Man dugo, an alonḱ ak aṅanem mel uyanan ak man kumaen panu lo yen da, an mi pempem yen a.

³⁵ Fun an ninen o aṅanem tini ganek Kristus lo yan abal yau amoi. Man dugo, Anut mel an naon tubun ak ipananḱ a. ³⁶ Anḱ atur sakar onḱ amado dan uyan a. An lo na Anut san ilo ibol ari dop mel a inḱ ipananḱ o ibol an aṅane wa. ³⁷ Man dugo, Anut ru igo ibol,
 “Saen katukan en yau dop, talpein ipalu wo igo yan ipalu ririan a,

agod in saen ibidani san tia ya.

³⁸ Gug n̄aisag tamol itaot an ilo rumok lo mi imado wa,
gug in isuk imul tap, n̄aisag n̄utug lo in o man ilog ta uyan na wa.”

³⁹ Ak man id tamolpein a dusuk dumul pe daon diñane dan sad tia ya. Tia, id man tamolpein a ilo lo rumok, an lo in̄aned n̄utud dida kisaek mi dumadop lo daon ta dile na dan nek ama ya.

11

Ilo rumok lo mi a

¹ Aria, ilo rumok man igo ya, mel a niñen o tinid tiganeg tumado dan id talon ak an ilasa wa, agod mel a ta tile na yan niñen o ilod rumok a. ² Ilo rumok an lo tamol wagem dumado na yan malak malak lo Anut per ipidinai a.

³ Ilo rumok lo mi, id talon ak Anut san wagin lo mel fidian idirai dilasa ya, an lo mel tile anen tia yan lo Anut iganeg idirai dilasa ya.

⁴ Ilo rumok lo mi, Abel Anut yai uyanan igane pani, agog Kein san irinani a. In̄san ilo rumok amaiak lo Anut in̄ yan̄an yabisag tamol itaot ak ibol a. Anut in̄san yai ganek an uyan ipani an lo ikubiai panad, in̄ tamol itaot a. Agod ilo rumok nek an mi lo, gidad in̄ imat la bo man, gamu id ru irupaiad on da.

⁵ Ilo rumok lo mi, Anut Inok tan en lo ipasig kumaen panu na in̄ane yau, an lo mateñ ta ile na ya. Agog Enok naon tan en lo ta dile na ya, man dugo, Anut in̄ane yau a. Gamugo in̄ane yau se man, Anut in̄ o ilo uyan yen dan ago irupidai a.

⁶ Rumok, ilo rumok a tia man Anut ilo uyan pani

san ta idaisuda na ya. Man dugo, talpein enti Anut sinjiren na yau o dop, malan malan mi Anut imado oṅ dan o ilon rumok a, agod inṣen amaiak talpein inṅ o abanṅ ile dan naon ipani wa.

⁷ Ilo rumok lo mi, Noa Anut san ru kagin panek ilonṅ a, an lo gidad mel an ta yil na ya, ak man Anut san awan aban an irig kagin ipani dugo wog tubun geig ak ifoug, ate inṅanen tamolpein ibinawai a. Inṅ ago igane an lo tan san tamolpein patud ipidinaig inṅaned aupasek iganeg walal te ilasa ya, agod ilo itaot an man ilo rumok igane ilasa dan anen muroun ilasa ya.

⁸ Ilo rumok lo mi, Abraham Anut san waginṅ ilonṅ go inṅanen panu ibiseig tan foun an san muroun ilasap imado wan ate Anut ikubiai panig yau a. Inṅ gidad tan an ta ilonṅ na yak gug Anut awan irig ate yau a. ⁹ Ilo rumok lo mi, inṅ tan a Anut ipani wo irupeṅ ante yaug san muroudi sinjired na dida dumado ya, nek ibol tamol gol imado wonṅ a. Aisak inṅ nanun Jakob da nek dal kisaek an mi lo Anut san promis dam diabi a. Agog inṅ Aisak Jakob da sisem sel ab lo dumado na ya. ¹⁰ Man dugo, inṅ ilo isou imug iganeg yau dan, taun tubun ak lo bag ila iso san tia yan te yau o da. Taun an san ab susek tamol man Anut mi a.

¹¹ Ilo rumok lo mi, Abraham gidad tubun bagen dilasa pasik go Sara dam niganig, ak man Anut Abraham nanuk foun ak taman ilasa san o dabai ipani a. Man dugo, Abraham san ilo rumok igo ya, enti a promis ipani an san nṅinṅ an kagin ipani wa. ¹² Amaiak nṅinṅ o tamol a kisaek lo mi, amaiak imat o igane bo man, inṅ tubun bagen dilasag ibol

patui lak na teil dak igo, agod loŋ na lul igo woŋ a. Ago man tusuti san tia ya.

¹³ Tamol en fidian ilo rumok lo dumado yaug dumat a. Inj Anut anen promis ru irupidai an nuŋon ta diŋane na ya. Tia, inj ibol asau mi dutur dugo malad yaug dile dugo an niŋen o ilodi uyanan ak igo ya. Agod tan en lo inj nek ibol tamol gol boi, tia, tamol naod senamo boi, igo woŋ dubol dugo dumado na ya. ¹⁴ Tamolpein ru ago dubol man kuai tem dukubiai panad ak inŋsiganed panu foun ta niŋen o abanŋ dile da. ¹⁵ Inj tan a dubusei la yan niŋen o ilod isou ak man saen idaisuda yen dan lo inj ka dumul diau a. ¹⁶ Ak man tia, inj tan senamo ta a dibisei la yan iriŋani dan niŋen o dumat da, an man kumaen panu san mi a. Amaiak niŋen o Anut tamolpein a inj niŋen o inŋsad Anut ago dubol dan, inj niŋedi wo miai ta ifuni na da. Man dugo, inŋaned taun tubun ak ta ikubuneg yen da.

¹⁷ Ilo rumok lo mi, Anut Abraham bitinaek lo igane dugo Abraham Anut awan yabig, nanun Aisak yai igane pani a. Tamol en inj Anut san promis inŋane yak gug, inj nanun kisaek mok an Anut yai igane pani wo igane da. ¹⁸ Ak man nanuk an niŋen o Anut Abraham irupeig ago ibol, “Ŋai Aisak kob ŋupani an lo inj tinin lo gup, oŋane bage murou sad dar wei mi dilasa wa.” ¹⁹ Abraham inj ilon lo Anut Aisak materŋ lo ifufuni yabisa wak ago ibol a. Ago yak niŋen o id mitilaen an niŋen ago tabol, Abraham nanun Aisak materŋ lo inŋane da ya.

²⁰ Ilo rumok lo mi, mel a murna dilasap diŋane wan niŋedi wo Aisak bar Jakob inj Esau da ipidinai a.

²¹ Ilo rumok lo mi, Jakob imat o dugo Josef nanun muroun kisaek kisaek bar ipidinai a. Insinanen makud fo kabuñan isoluwig igudani a.

²² Ilo rumok lo mi, Josef san saen wadan sumeik ipani dugo Isrel tamolpein saen a in Igipta tan dubuseip dilasa san niñen o inñanen tatu an dugon te digane wak san ru kagin irupidai a.

²³ Ilo rumok lo mi, Moses ilasag saen katuk imado gug tinan taman diñane diaug dimianig kalam utol imado ya. Man dugo, in dile yak man malad lo uyanan mok a, agod kin san ru dabai anda yan niñen o dam ta direr na ya.

²⁴ Ilo rumok lo mi, Moses saen tamol igane man in Farou nanun pein san nanuk ago dubol man imoi a. ²⁵ In gidad Anut anen tamolpein dadi Igipta paed na muruan isini wo igane ya. In tan na saen katuk an mi aupasek igane dop sen ifutuwi man imoi a. ²⁶ In misilanek Kristus yañan niñen o ile man Igipta sad bala filian an fidian irinani pasik an ibol a. Man dugo, inñan ilo isou imug yau an lo inñan urat naon ile ya. ²⁷ Ilo rumok lo mi, kin san tinæ saiak o ta irer nag Igipta ibiseig yau. Man dugo, enti a id tile wan tia yan in ile yak igo an lo itur sakar na ya. ²⁸ Ilo rumok lo mi, in Pasova nal an san kulob an yabituani dugo dar ifurfi a, an lo enjel ager san ta Isrel sad nanuk matu ak irinani dugo yaug Igipta sadi an mi ifu dumat a.

²⁹ Ilo rumok lo mi, Isrel adi beig daran ak titinæm dudug ibol tan aten igos ak ate diau won a, ago gug Igipta adi nek dal kisaek an mi lo digane wo dugo disarir dudu diaug you duluk go dumat a.

³⁰ Ilo rumok lo mi, Jeriko panu san ar pat nam dufou itilani an, nal 7 Isrel adi ditilianig ditor an lo ar an sen ibilani yau idu ya.

³¹ Ilo rumok lo mi, jeit pein Rahab, ilo maror lo abanj leil tamol adi uyan ipidinai an ninjen o, panu an san awa parsisalek adi luad te ta dufuni imat na ya.

³² Agod gamu fon naj dugo njabol ak i? Naj Gid-ion, Barak, Samson, Jepta, Dawid, Samuel agod profet adi dam ninjedi wo njabol san saen tia ya.

³³ Tamolpein amaiak inj Anut ilod lo rumok a. An lo na inj kinj aenta dibiai dudu dak, aenta tamolpein kagin dipidinai dak, agod aenta inj Anut mel ipidinai o ibol an dijane da. Aenta injaned ilo rumok an lo na inj laion awad dufutani da.

³⁴ Aenta yai balen tubun mi ided dan digane imat dak, aenta dusol dop sabiri nam dufu dumat san tia ya. Ilo rumok an lo, aenta inj dabai amad tia bo man dabai dijanep, yu lo injaned ager aben senamo ak san an dibiai dudu se ya. ³⁵ Pein injaned nanuk dumat an ilo rumok lo profet injaned nanuk an ifufunai dimasag dijane ya. Aenta dufu malad dusue yan malak malak sed kuai te idirai dilasa man dumoi a, man dugo, mitep matej aben lo dumasa gup madok uyanan ak inj sad turenj tan en lo irinjani an dile wa. ³⁶ Aenta kukok ad digane dugo, aenta dusukutai dugo, aenta sein nam banidi dususeg diriai subanek ab lo diau a. ³⁷ Aenta pat nam dufu dumat dugo, aenta soa nam dututeg ananaem dilasa dugo, aenta bainat nam dufu dumat. Ilo rumok tamolpein an bilelek sunjolon an tinid nam dubuluwig dutor da, inj melmel ad tia agog tamolpein saian dupidinai dugo malad dusue na ya.

³⁸ Ilo rumok tamolpein an aben igosan ak lo, did lo gidigheid dutor dugo, gib did fun te agod gib tan ilon lo an lo ñioñ diabi se ya. Tan en san tamolpein dida dumado san ta idaisuda na ya.

³⁹ Tamolpein an fidian injaned ilo rumok niñen o Anut per ipidinai a. Ago igane bo man inşad kisaek ta Anut promis ru ibol an lo mel an ta injane man tia ya. ⁴⁰ Man dugo, wagam mok Anut mel ta nen uyanan ak idsad saen an lo ilasa wan ile ya. An man tamolpein an id tia yak man itaot dilasa san tia ya, tia, in id da sisem itaot tilasa wa.

12

Anut inşan nanun muroun bu ipidinai da

¹ Fun an niñen o ilo rumok tamolpein adi dumat la yan nek ibol doup malan tubun ak ta dilasap kukok dile dak ago id ditilianad dulubanad go dutur da. An lo id inşad kagin dutur sakar san an tagam a. Fun an niñen o id muruan in aupasek da tinid lo ibiagatad go yen dan fidian tabi yau a. Ago dop id ilod kisaek sed dabai ipanad pe dal an fo Anut tom idiri panad an lo mi tumaspalup taup tom wadan an fo tisida wa. ² Id fidian malad yaup Jesus tile, in mi idsad ilo rumok fun a, agod murnap in mi idsad ilo rumok an iganep itaot mok ilasa wa. In aigim an san muruan ileg an patun ta ipani na ya. Tia, in murnap Anut ilo uyan tubun mi ipani wan niñen o aigim san miai an man mel kabelan igo won ile ya. Ago yak niñen o gamu in Anut banin won ak ate yanak tubun ak injaneg imado da.

³ Ilom isou uyanan, aupasek adi dumisilani dop muruan funfun tinin fo digane se ya, ago yak man

in̄ itur sakar a. An nin̄en o kabelan an̄ ilom iyalis dop ilom idu banau.

⁴ Rumok, an̄sam aupasek an da nug afuni da, ak man wagai agane dan lo an̄sam dar an gamugo ikulmaek da. ⁵ Agod en dugo, an̄ Anut ru kagin a irupaian̄ na yan lo in̄san nanun muroun ago ibol an̄ ilom in̄jaon̄ di?

“N̄ai nanug, Tubun en bu ipano dan kabelan mel kawan ubol banau, agod an nin̄en o on̄ ilo idu umoi.

Man on̄ mel gane saian amaiak nin̄en o naon bu ipano da.

⁶ Man dugo, Tubun en in̄ talpein nin̄en o imat mok dan ru kagin irupeidak, agod talpein a in̄ nanun muroun igo won̄ in̄jal dan bu ipidinai da.”

⁷ Kagin ipitejanan̄ san nin̄en o muruan lo atur sakar a. In̄ ago igane dan lo in̄san nanun muroun igo won̄ kagin ipanan̄ da. En dugo, nanuk ta lulun̄ad lo imado dan in̄san taman bu ta ipani na i? Man tia geig a. ⁸ An nin̄en an̄ Anut bu ta ipanan̄ dop man, an̄ in̄san nanun muroun tia ya, tia, an̄ man jeit kagin san nanuk mi igo won̄ a. ⁹ Fon taida mi, id fidian tamad muroud bu dupanad da, agod id an nin̄en o ilod ta saian da. Tia, kulob amaiak nin̄en o id in̄aned awadi turi da. Ak an ago tap, id dam idsad ur san Tamad an awan paen na tumado dop an lo kumaen tumado wa. ¹⁰ In̄sed ilod ibol ak lo saen katukan en lo mi bu dupanad da. Ak man Anut id ibinawad uyanan san nin̄en o mi bu ipanad da, man dugo, nek ibol in̄ gun imado dak ago mi id dam gun tilasa wa. ¹¹ Talpein bu in̄ane dak saen an lo in̄ madai ilon̄ da, an man sin̄jaokan

tia ya. Ak man mite dugup amaiak tamolpein an kagin a lo dal ipitenjanai la yan ilod lo nuḡon igane ilasa da. Nuḡon an man ilod itaot a, agod ilo maror amad da wa.

¹² Amaiak niḡen o aḡ banimi imagor dan abisa wa, agod turumi dabai tia yan dabai apani wa.

¹³ Niemi aten san dal itaot an akubune wa. An lo aḡ niemi akupakip oḡ ator dan san batek an ta ifurati na wa, tia, niemi an uyan ilasa wa.

Aḡ Anut awan ta aparsisali san ru kagin

¹⁴ Aḡ tamolpein fidian dadi ilom kisaek san maror lo mi amado ator, an niḡen o dabai agane wa. Agod gun alasa wo an dam yaes ifunaḡ a. Talpein enti ago ta igane na tap, Tubun en ile san tia wa. ¹⁵ Kagin agane, kabelan talpein ta aḡ luluḡam lo Anut anen ilo panek ipanaḡ an yabigule banau. Kabelan talpein ta, dulun gigen ak igo aḡ luluḡam lo isap, an lo talpein fidian bubed igane saian banau. ¹⁶ Talpein ta jeit kagin ta igane na wa. Tia, ta ibol Esau igane ago Anut awan ta iparsisali na wa. Inḡ anaḡ kabelan a tein bakan ak san na inḡane yan niḡen o inḡanen nanuk matu ak san bar ibidani yau a, kabelan aḡ dam nek ago mi Anut patum apani banau. ¹⁷ Man dugo aḡ aloḡ ak, murna gug inḡanen matu san bar a ibidani yau an fon inḡane wo igane ya, ak man Anut patun ipani a. Ago dugo inḡ tinaḡ igane bo man ilon ibileksa san dal ta ile man tia ya.

¹⁸ Ak man nek ibol Isrel sad tubud adi did Sinai na dile yak igo woḡ mel naok en aḡ ta sumeik apani na da: did a diabi dile o Anut naod ifutani an, yai balen tubun mi imasa dan, tidom tubun

geig an, duwadau ifure dan, ¹⁹ tour ilinjan dan, agod awak ta man tamolpein a dulonj an ru taida irupidai imoi o ago dumosiai an, mel naok ago yan sad na anj ta apalu na da. ²⁰ Man dugo, ru kubiaen a ibol ilasa yan kududod lo madai ipidinai saian mok a. Agod ibol, “Gidad mel mudan ta did en yabi ile tap, pat nam afunip imat a.” ²¹ Rumok, abanj a ile yan san naon man urer san mok igo ya, an lo Moses ago ibol, “Njai narut go narer saian mok da.”

²² Gug anj did Saion fo na apalu ya, Anut kumaen imado dan san panu Jerusalem o keit lak na yen dan lo apalu ya, agod aben an lo man enjel malan tubun pempem yousai lo mi dumado da. ²³ Anj Anut san nanuk matu matu ak yanad buk lo igireg yen dan sad midaenj ilon lo aladu ya. Anj Anut a tamolpein fidian sad bitinaek tamol an san na apalu ya, agod tamol itaot ak sad ur Anut idiraig itaot mok dilasa yan dam sad na apalu ya. ²⁴ Anj dam Jesus san na apalu ya. Injen amaiak kontrak foun ak san titinae tamol igo ya. Abel san dar in naon panek o Anut iwaginj a, ak man Jesus san dar a dufurfi an lo Anut san ilo panek o iwaginj da, nek dar amaiak lo injan na apalu ya.

²⁵ Kagin agane, enti in inijen dop awan ta aparsisali na wa. Tamol a tan en lo ru kagin irupidai dugo awan duparsisali na yan lo, muruan an dirinani man tia ya. Aria, Enti a kumaen panu lo imado dugo ru kagin irupaiad dan, id injan awan tiparsisali tap, tasol tau san tia geig a. ²⁶ Saen Anut did Sinai fo idu yan lo injan wagin tan iganeg itugurer a. Ak man gamu inj promis ru igo ibol, “Njai afon nal kisaek taida mi tan en njuguri wa, tan

mi tia, tia, mel fidian lak na agod tan en dam sisem nguguri wa.” ²⁷ Ru a “afon nal kisaek taida mi” an fun man, mel a iguri an ipasai yau a. An man mel a fidian fun lo idirai dilasa yan itout yau pasik a. An lo melmel a talpein ta iguri san tia yan ibisawaip pempem dien a.

²⁸ Amaiak ninen o id aban a tamol ta iguri san tia yan ilon lo idsad kin kagin ipanad dan tinane ya. An ninen o id ilod uyanan a. Agod id kagin tiganep tarut dop ubou a Anut ilo uyan tupani san an mi tile wa. ²⁹ Man dugo, idsad Anut man ibol yai balen ided pe mel fidian inantiti yau dak igo ya.

13

Ru kagin san wadan

¹ An kisaek kisaek pempem teim taom igo won nug ninen o amat a. ² An tamolpein asau ak anjal an sam ab lo apalu san ta ilom injaon na wa. Man dugo, wagam tamolpein ta kagin an digane dan lo enel insad ab lo kagin dupidinai uyanan gug ta dulon na ya. ³ An ilo rumok tamolpein a, subanek lo dumado dan ilom isou dop amado wa, nek ibol an dam dadi subanek ab lo amado dak igo won a. Tamolpein a aenta saian dupidinai dan, an dam ilom isou wa, nek ibol ansem insad muruan asini dak igo won ago abinawai a.

⁴ Nug iwon naneke lulunam lo man gun ilasa wa, nug iwon naneke san badim an nun aman tia wa. Man dugo, Anut jeit adi in talpein a nug iwon naneke malan dusue dam bitinaek lo idirai a.

⁵ Ananem turen lo moni ninen o yaes ta ifunan na

wa. Anj mel dugon am da yan, nek an idaisuda yak igo ilom isou wa. Man dugo, Anut wagam ago ibol, “Onj tini gane panag tap, naj onj patug ta nupano na wa,

agod onj nibisawo san tia wa.”

⁶ Fun amaiak ninjen o, ru e id tabol ilasa den man ru rumok a,

“Tubun en man najisag binawek, an ninjen o mel ta wo naj ta narer na wa.

Dugo, tamol ta mel ta lo dam naj ifunag san idaisuda yak i?”

⁷ Ananem gurman Anut anen ru durupaian na yan ilom isou. Injad kagin naok naok san nunjon uyanan kuai isi a, an mi ilom isou wa. Agod injad ilo rumok anj dam ananep abi wa. ⁸ Jesus Kristus ta ibiliso ibilila na wa. Tia, wagam mi, gamu en, agod pempem mi dam nek ago mi imado yau a.

⁹ Pitejanek funfun a, agod pitejanek naon sen ak san dam lo anj ilom injane dop adeg au banau, an amoi. Mel ta ilod dabai ipani san man Anut anen ilo panek mi a. Id ananj dugon tani san ru kubiaen funfun lo bubed dabai ipanad san tia ya, agod tamolpein a ananj san geg duri dupani dan, inj dam ibinawai san man tia ya. ¹⁰ Id ilo rumok tamolpein alta amad da ya, an fo man talpein a Juda sad ubou ab lo urat digane dan, ananj dijanep diani san man Anut kob ta ipidinai na ya.

¹¹ Man dugo, nek ibol mel mudan san dar pris gurman banin lo injaneg aupasek isuas yau o galun Gun Di, Gun Mok ak lo iladu yau a, ago gug injanen tinin panu patun fo dumari igo wonj, ¹² nek ago mi Jesus dam, injinanen dar nam tamolpein gun idirai dilasa wo panu san dalawan patun fo madai ile

ya. ¹³ Amaiak ninjen o id dam panu en tibiseip kuai te tilasap misilaneq in isini an id dam tisini wa.

¹⁴ Man dugo, tan en lo man id panu ta saen milaen mok yen dak tile man tia ya, an ninjen o id panu a pempem yen amaiak aban an tile dop tumado da.

¹⁵ Amaiak ninjen o Jesus lo, id pempem Anut per tupani wa, an idsad yai ganek Anut tupani dak igo ya. An man awad a in san yan an ninjen o tabol ilasa dan san nunon rumok ak mi a. ¹⁶ An kulob uyan uyan a agane dan, agod tamolpein aenta abinawai o ilom ta in aon na wa. Man ata wo, yai ganek naok ago yak Anut ninjen o imat mok da.

¹⁷ Ananem gurman awad paen na amado dop in dubol ago agane. In an nutumi kagin dupani da, ago dop murnap Anut in urat dugon digane an naon sumiaek lo idiraip nunon ile ilon a. An in awad paen na amado tap man, in yousai lo mi urat digane wa. Kabelan an muruan apidinai banau, man dugo, an ta ibinawan na wa.

¹⁸ An man ninjema wo Bai Anut agudani wa. Man ata wo, man mukubiani dak mananem ilo girek an Anut malan lo itaot a, agod mel fidian lo kagin uyanan ak mi migane wak ago iloma lo yen da.

¹⁹ Nai an tubun mi ago agane wo nususan an da, an lo Anut ririan nai idinag pe an sam na nupalu da wa.

²⁰ Aria, maror san Anut amaiak, kontrak pempem san an san dar lo, bilelek sad titianek malan te yan, Jesus idsad Tubun en, mate in lo ifufunig yabisa da yan, ²¹ yu san bioun uyan uyan ak urat lo dabai ipanan san an fidian ipanan a, an lo na in anen ilobol agane itaot a. Ago dop mel dugon in san malan lo ilo uyan ipani dan an ilom lo igane

ilasa wa. An man Jesus Kristus san dabai lo igane ilasa wa, inanen yanjan dam id pempem tabisa wa.

²² Teig taog, tok abol pe amado dop kududom agurep ru kagin en aloŋ uyan o ŋusumianaŋ da, man dugo, ru en katukan mi ŋigire ya.

²³ Id teid Timoti subanek lo dupasi amaiak da aloŋ o ŋabol da. An niŋen o iŋ ipalu kisaek dop man ŋiŋanep da mupalup miliaŋ a.

²⁴ Maŋanema ilo uyan ru aŋanem gurman adi, ilo rumok adi aenta dam arupidai dop duloŋ a. Ago dugo tamol ensauta Itali na dupalu yan, dam iŋaned ilo uyan ru aŋsam na digane ipalu ya.

²⁵ Bai Anut anen ilo panek aŋ da pempem amado wa. Rumok.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d